

Arubiano Pedro Nicolaas "Niki" Tromp honra cu plenchi na Boneiro



RIBA diahuebs, dia 5 di september, e entidad publico Boneiro a devala nomber nobo di un plenchi na honor di Pedro Nicolaas "Niki" Tromp, un ciudadano distingui y keri den nos comunidad.

Oranjeplein, pega cu Passangrahan, caminda e prome Oficina di Turismo tabata situa y na unda Tromp a traha como director, tin un nomber nobo. Awo e plenchi ta carga e nomber "Plaza Niki Tromp" como reconocimiento pa su contribucion inmenso n'e desaroyo di turismo y comunidad Boneriano.

Durante tres decada e nomber Niki Tromp a zona dur riba e islanan aki, conoci no solamente como director di turismo, sino tambe como periodista, boluntario y lider den deporte. Niki tabata encarga cu turismo y Regata di Boneiro, y a traha den un forma intensivo pa promove Boneiro como un destinacion turistico preferi.

Niki a nace na Aruba dia 5 di december 1937 y despues di su estudio, a traha na refineria Lago. Despues di a acumula suficiente experiencia, Niki a traha un temporada cortico na Corsou y despues a sigui pa Boneiro, unda el a dirigi e compania di seguro British American.

No a tarda mucho prome cu el a bay traha na gobierno di Boneiro, caminda despues di algun tempo el a asumi e posicion di director di Oficina di Turismo, situa riba e mesun plasa cu awe ta carga su nomber.

For di e sitio aki, Niki Tromp a traha duro pa pone Boneiro riba mapa turistico mundial. Cu sosten di persona manera Hugo Gerharts y Don Steward, Niki a pone e base pa turismo di buceo y Regata Internacional di Boneiro, un evento cu e



tabata organisa pa mas cu 30 aña.

Banda di su trabao den turismo, Niki tabata un figura prominente den e medionan di comunicacion. E tabata coresponsal p'e corantnan La Prensa y Extra y a bira hopi conoci como reportero di Z86 (Curom) na Boneiro cu su agencia noticiero Multro.

Apart di esaki, Niki a funda Club di Prensa Boneriano y tabata activo den diferente otro proyecto social y cultural, hasta maneho di e ekiponan di baseball y softball y tambe el a presidi e grupo di aguinaldo "Los Pajartos Navideños."

Niki a fayece dia 7 di augustus 1992, un noticia cu a conmove henter comunita Antiano. Niki Tromp su legado lo keda bibo y e Plasa awo ta carga su nomber lo sirbi como recordatorio di su contribucion na Boneiro y pa sigui honra su memoria.

